

2 BETESALONIKA

É Kálara Beañ Betesalonika

Mebéránn

1 ¹Pablo bíabe Silvano ya Timoteo, á mfá ékóánn bebwíni é ne á Tesalonika, ébe Nzamá é Tará wea ya fe ébe Ntí Yesukristo: ²Mvɔmm ébe mína ya mvwaá ébe á mfá Nzamá é Tará wea ya ébe Ntí Yesukristo.

Pablo aa yaglan ya Betesalonisense

³Á bɔbédzan, bía yian vé Nzamá akíba tám áse á mfá wenan ámvála é ne nzósoó, amú ná mbwínánn wenan wá bíra vém, ya fe édzinɔ kada mot mbɔɔ ya mbɔɔ ye ébe mína á mfá é bot bevɔɔ dá dá fwíge fe; ⁴ya akekwiñ ná bía bébyen bía kɔbɔ ya engún á mfá wenan ébe bíkóánn bebwíni Nzamá, ákála mbán wenan ya mbwínánn ébe ádzén áse bá dzén mína ásí ya mídzuúk mína nzomo. ⁵Édí te é ne ndem ye éndendaɔ ébe é nzósoó nkíkɔán misaɔ Nzamá, á mfá ye á léreban ná édzwée ngómán Nzamá mína yian ya dɔ, amú ná dzam te édɔ mína yén ya dɔ midzuúk. ⁶Akála ná é ne nzósoó ósú Nzamá ná, á búlán vé mídzuúk ébe ébá bá vé mína midzuúk; ⁷ve mína, é bot mína yén midzuúk, ávé mína awaabé bíabe mína éyɔ Ntí Yesu aa ye váma, eé sɔ á dzóp á nkaba ndúán été, bábe bíwólo bí baáŋgel byeñ; ⁸eé vé akunɔa ébe ébá bé ne kaa áyem Nzamá, ya fe ébá bé ne kaa ábɔ é mbamba fwéñ Ntí wea Yesukristo mewók. ⁹Ébá béte, bá ye dzuk ya ákira é ne mbéámbéá ntsamann, bá tɔbɔ nkánán bábe Ntí, ya fe ébe dúmá ye é nguu Deñ, ¹⁰é tám aa ye sian á mfá áñɔ dúmá ébe mítɔpban myeñ mos te; ya á mfá ákpoo mevoó ébá bésesé bé bwíni yaá. Amú ná míní bwíni yaá é ngañiá wea. ¹¹Éde, á mfá édí te, bía yaglan tám áse ákála denan, ná é Nzamá wea á lán mína ané ébá bá yian ya ékígá deba, á dzálá fe mbamba nkómánn óse ya eséññ nguu ye á mbwínánn; ¹²á mfá ye ná éyola Ntí wea Yesu é tɔbɔ ya dúmá ébe mína, mína fe ébe éñe, amú é mvɔmm é Nzamá wea ya éñí Ntí Yesukristo.

Ákúlu mbémbéa mot a ne ntébosú

2 ¹Ve, á mfá áśśó Ntí wea Yesukristo ya ékóánn dea fufúlu bíabe bó, á bóbédzan, bía dzaa mína ná, ²míní táa bó ebúbú ye áyébe ná bé fógo áśímánn denan, kaa ki ásigan, ngé ya nsísim enziñ, ngé ya efíá enziñ, ngé ki ya kálara enziñ, amvála ané a ne áawe, éñí bí ne dzó ná é mos Ntí ó sian yaá. ³Mot enziñ a táa mína duk amvála enziñ, fáve kaa ná meló méye ákólo é nzenn Nzamá mé tára sian, ya fe ákúlu ekúkwát mot, éñe a ne mwán ye á ntsamann mam, ⁴éñí a téle Nzamá á ngamm áyát, a bére émyen ó yóp, ébe edí ésesé bá lwée ná Nzamá, ya é dzóm bá kan, akekwiñ ná aa tɔbo ósí é templo Nzamá, eé lére ná émyen a ne Nzamá. ⁵Ye mínáá síman ná ma tára mína kóbo dzaa te, á koan ná me ngén me tɔɔ bíabe mína? ⁶Mína yem fe é dzóm dá biñ ní éndagá, á mfá ye ná á kúlu é tám deñ. ⁷Amú ná éséññ ntsamann metsiñ ye edí dá nzaman kén mot é tára yaá. Ve ná éñí aa biñ ní éndagá, aa ye dɔ bó akekwiñ ané émyen aa ye kólo énzénzan te. ⁸Éde véa, ntsam métsiñ te aa ye kúlu, éñí Ntí Yesus aa ye ywíñ ya evúñ ye ánu deñ, aa ye ní tsam ya mikwikwiñ míye áśian deñ. ⁹Ákúlu mbémbéa mot te dá ye bɔban amvála mbɔann éséññ Sátan ó ne, ya é nguu ése deñ, ya mendem, ya biyágán bí mam bíye á mineá. ¹⁰Éde fe ya meduk mése méye ekúkwát á mfá ébá bá dzán, akála ná béé ndzí ñɔñ édziñ é ne bébélá ná bé tɔbo nkoránn. ¹¹Ya dzaa te édo Nzamá aa ye lóm mbɔann éséññ méduk, á mfá ye ná bé bwíni mineá míte, ¹²ya fe ná bé kík misan ébá bésebé bé ngá bó kaa ábwíni bébélá, fáve ná bé ngá bó béé sán ya ekúkwát. ¹³É bóbédzan bé ne mindzindziñ Ntí, bía yian vé Nzamá akíba eyɔñ ése akála denan. Amú ná Nzamá aá tɔp mína ané é ngap ósúá, á mfá akoroga étɔɔ eki ye á Nsísim, ya ábwíni bébélá. ¹⁴Dzaa te édo fe a ngá lwée mína ya dɔ ébe é mbamba fwéñ wea, ná míní koan ya é dúmá Ntí wea Yesukristo. ¹⁵Édo é ne ná, á bóbédzan, yémján nguu, á baale fe méyagalé bé ngá vé mína ébe efíá, ya fe é kálara wea. ¹⁶Ve Ntí wea Yesukristo émyen ya Tará é Nzamá wea, éñe a dziñ yaá bía, a vé yaá fe bía mfoñann mílém ó ne mbéámbéá, ya mbamba oyan akála mvɔmm. ¹⁷Éñe á foñe mílém myenan, á yémje fe mína ébe éséññ ése ya mbamba efíá.

Pablo aa dzaa ná bé yaglan

3 ¹Á bóbédzan, asúgánn é ne ná, yaglánán ya bía á mfá ye ná efíá Ntí é dzíga myaman, é ñɔñ fe dúmá, ntéññ mbɔɔ ané ébe mína; ²ná bí tɔbo nkoránn ébe bembéa bé bot ya bikúkwát bí bot, amú ná bot bése béé belé mbwínánn. ³Ve Ntí a ne éñí bá tɔbo ya ní mebúnn, éñe aa ye mína yém ya fe á baale mína ébe á mfá mbéa [mot]. ⁴Bí tɔɔ ya mebúnn ébe Ntí akála denan ná edí bí mánan ya mína, mína dzálá dɔ, mína ye fe tsíni ná mína bó dɔ. ⁵Éde Ntí á wulugé ya mílém myenan ébe édziñ Nzamá, ya étɔɔ mbán ébe Kristo.

Bot bése bá yian bɔ eséññ

⁶Á bɔbédzaŋ, bía mánan mína ébe éyola Ntí Yesukristo ná, míní kánan ya é mwadzaŋ áse aa niŋ ané ondéndeát, ámvála é ne kaa vakgan ya áyágale míní ngá ñɔŋ ébe bía. ⁷Amú ná mína bébyen mína yem amvála ané dá yian ná míní bee éfonann dea, akála ná bíf ndzí niŋ ané andéndeát énzénzaŋ denan; ⁸bíf ndzí ki dzí bidzí mot enziŋ á dás, fáve ná bíf ngá dzuk ya biséññ bíf nguu alú ya ó mos, á mfá ye ná bíf nza bɔ mot enziŋ ye ébe mína mbaŋa; ⁹se ákála ná bíá yian ya dɔ, ve á mfá átéle bía bébyen ané ovaŋga ébe mína ná míní vú bía. ¹⁰Amú ákoan ná bíf ngén bíabe mína, bíf ngá mánan mína é dzam dí ná, ngé mot enziŋ áá kómo séñ, áá yian ki dzí. ¹¹Akála bía wók ná, bot benziŋ bá niŋ ané andéndeát énzénzaŋ denan, ébɔ kaa áséñ, fáve áke bá duman éyá mam. ¹²Ve ébá béte bía mánan ya álép fe bɔ ébe Ntí Yesukristo ná, bé séñ ya nlém ó bóo bɔ ósí, bé dzá bidzí byeba bébyen. ¹³Ve, á bɔbédzaŋ, míní táa vwat ná mína bɔ édí é ne mvéáñ. ¹⁴Éde ngé mot enziŋ a bɔ kaa ábɔ mewók áyágale ye é kálara ñí, á bílán mot te, míní táa ki wulu esaŋann ya ñí, éde ñí aa ye wú osoán. ¹⁵Ve kaa ñɔŋŋán ñí amvála ané nsíŋ, fáve ná ávé ñí mbámm ané mwanñɔŋ.

Meyáán

¹⁶Éde Ntí émyen ye á mvwaá, á vá mína mvwaá eyɔŋ ése ébe mam mése. Ntí a tɔbɔgé ya mína bésesé. ¹⁷Ma Pablo, ma ma bérán ya mína ya é wéá wɔm, ndem ye é kálara wɔm áse ma tsili e ne aaná. ¹⁸É mvɔmm Ntí wea Yesukristo eé tɔbɔgé ya mína bésesé.